

1 Juan

¹⁻³ Jue'e højts mijts nyajnäjaayøøby, ja'a Jesucristo. Dioshuung je'e. Jíiyäm je'e hänajty møødä Dios mänaa hädaa yaabä naaxwiin yhawijy tiøø'xta'aguiän. Jaayá'ayäts hajxy xyhawáanäm nebiä Dios wyiinmay. Jaayá'ayäts hajxy tøø xñähho'túutäm neby hajxy jaduhñ njugyhájtämät nebiä Dios jiugyhatiän cøjxta'axiøø. Tøø højts nhamdsoo hixy; tøø højts nhamdsoo mädoy. Tøø højts nnähdoñ cø'øhaam. Tøyhajt jaduhñ. Paady højts mijts jaduhñ nhawáanäm neby hajxy jaduhñ nhíjtämät tu'ugmädia'agy, neby højts ja'a Dios xmiøødhitiän tu'ugmädia'agy møødä yHuung.

⁴ Paady jaduhñ nhawáanäm neby hajxy jaduhñ joocujc nhíjtämät tehngajnä.

⁵ Hoyyä Dios ja'a wyiinmahñdy; cabä pojvä cädieey ñä'ägädä møødä. Jaduhñ højts ja'a Jesucristo tøø xyhawaanä, y jaduhñ mijts nhawaanädgágätsäm. ⁶⁻⁹ Coo hajxy hoy nwädítämät nebiä Dios yhtiän, tu'ugmädia'agy hajxy jaduhñ nhíjtämät, je'eguiøxpä coo ja'a Jesucristo hajxy tøø xñähho'túutäm ja'a nbojpä ngädieeyhájtäm cøxiä. Xyajnähwáatsäm hajxy jaduhñ coo ja'a nbojpä ngädieey hajxy nnägápxämät. Tøyhajt jaduhñ. Cabä Dios yhøhñda'agy. Howyiinmahñdy je'eduuhñ miøød. Pero coo hajxy nwädítämät haxøøgtuum, cabä Dios hajxy nmøødhíjtämät tu'ugmädia'agy. Høhñdáacäm hajxy jaduhñ y cabä tøyhajt hajxy nnä'ägädä møødhájtäm.

Jaanä jaduhñduhmbä, coo hajxy nnä!ä mänääñämät cooc tyijy pojvä cädieey hajxy nga'a mōødhájtäm, niwyiinhóhñäm hajxy jaduhñ, ¹⁰ y cabä Dios miädia'agy hajxy nmöødhájtäm, ja'a tøyhajt. Coo hajxy jaduhñ nmänääñämät, jaduhñ yajmädowa'añ cooc tyijy ja'a Dios yhóhñda'agy. Hix, je'e jaduhñ mänaamb coo pojvä cädieey hajxy nmöødhájtäm.

2

¹ Mäg'uughajpädöjc, cábøch njoot chocy coo hajxy haxøøg mjatcó'øwät. Páadyhøch mijts hädaa nocy nyajnäjaayø'øy. Coo pøn jaduhñ jiatcó'øwät, nähgaptu'udøøjäp je'e Jesucristäm jim maa Diosän. Cabä Jesucristo pojvä cädieey mänaa miøødä. ² Tøø ja'a nbojpä ngädieey hajxy xñähho'túutäm nägøxiä hädaa yaabä naaxwiin.

³ Coo hajxy ngudiúuñämät nebiä Dios hajxy xyhanéhmäm, mänitä tøyhajt hajxy nmöødhájtämät coo je'e hajxy nhixyhájtäm. ⁴ Pøn jaduhñ nä!ä mänaamb: "Nhixyhájpiøch je'e", hoy quia'a ja cudiuñ, høhñdaacp je'eduhn. Hix, ja'a Diosmädia'agy je'eduhn quia'a tsojpy. Tøyhajt je'e. ⁵ Pero pøn jaduhñ cudiuumb, cähxø'p jaduhñ coo ja'a Dios jiaançh tehm jiahmiech. Jaduhñ hajxy nyajnajuóøyyämät coo hajxy nmöødhíjtäm tu'ugmädia'agy. ⁶ Pøn jaduhñ mänaamb coo ja'a Dios miøødhity tu'ugmädia'agy, tsipcøxp wiädítät nebiä Jesucristo hijty wiäditiän.

⁷ Hädaa mädiá'agyhøch cham nyajnähixøøbiä, tøø hajxy hijty mmädoy mänaa hajxy mmäbøjtsooñän. ⁸ Pero hädaa mädiá'agy jaduhñ, jaduhñ mäwlinäts hädaa nebiä hawiinjemýbiän.

Hix, jaduhñ hajxy mničhocy mnibia'häyoyii nebiä Jesucristo hajxy xchójcäm. Tøyhajt jaduhñ. Coo ja'a Jesucristo yaa tøø yhoy hädaa yaabä naaxwiin, mänitä homiadä'agy hajxy xyajwiinjuøøyyänä. Cab hajxy jaduhñ nwädítänä hagoodstuum.

9-11 Pøn ja'a y'hermano tsojp pa'häyoob, hoyyä Diosmädia'agy jaduhñ quiudiuñ. Coo hajxy jaduhñ ngudiúuñämät, cab hajxy ngädiéhyyämät. Pero pøn ja'a yhermano mähañhajp, hoy jia mäna'añ cooc tyiji quiudiuñ ja'a Diosmädia'agy, je'enä wiädity hagoodstuum. Jaduhñ wiädity nebiä wiindspän. Cab jaduhñ ñä'ägä niyaghoyø'øyii.

12-14 Hermanodöjc, míjtshøch hädaa nocy nyajnäjaayøøby. Mhixyhajpiä Dios hajxy, ja'a nDeedyhájtäm. Jaaya'ay ja'a nbojpä ngädieey hajxy tøø xyajnähwáatsäm je'eguiøxpä coo ja'a Jesucristo hajxy tøø xñähho'tüutäm. Mijts majjäya'adiöjc, mhixyhajpiä Jesucristo hajxy jaduhñ. Jíiyyäm jaaya'ay hänajty mänaa hädaa yaabä naaxwiin yhawiyi tiøø'xta'aguiän. Y mijts muutsc-häna'c-hajxy, xmioobiä Dios ja'a mäjaa hajxy coo ja'a Diosmädia'agy hajxy tehngajnä mbanøcxy. Cabä møjcu'ugong hajxy tøø myajmäjäda'agy.

15 Cabä mjoot hajxy mbädä'agät hädaa yaabä naaxwiin. Coo pøn jaduhñ piädä'agät, cabä Dios hoy jiahmiédsät, ja'a nDeedyhájtäm. **16** Ja'a møjcu'ugong jaduhñ mänaamb coo hajxy cøxiä wiinä nhadsójcämät hädaa yaabä naaxwiin, ja'a haxøøgpä. Jaanä jaduhñ miänaambä coo hajxy nyajcumáayyämät. Pero cabä Dios jaduhñ

miäna'añ. **17** Cuhdägoyyaamb hädaa yaabä naax̄wiin møødä haxøøgpä yaabä. Pero pøn cudiuumb nebiä Dios miäna'añän, cab jaduhñ mänaa quiuhdägoyya'añ. Jim yhida'añ maa ja'a Diosän cøjxta'axiøø.

18 Hoorä, habáatnäp jaduhñ coo ja'a naax̄wiimbä wyiimbida'añ. Tøø hajxy mmädoyhaty coo ja'a Cristo miädsip quiähxø'øga'añ. Y tøø ja'a miädsiphajxy may quiähxø'øgy. Jaduhñ hajxy nyajnajuøøyyäm coo yhabaatnä. **19** Xmiøødhíjtäm ja'a Cristo miädsiphajxy hijty. Pero coo hajxy tøø xpiuhwáatsäm, cähxø'p jaduhñ coo hajxy hijty tehm̄ tiøyhajt xquia'a møødhíjtäm hamuumdu'joot. Coo hajxy häxøpy hijty xmiøødhíjtäm, cab hajxy häxøpy tøø xpiuhwáatsäm.

20-21 Pero mijts, ja'a Jesucristo hajxy tøø xyajnäguexy ja'a Dios yhEspíritu. Mmøødhajpiä tøyhajt hajxy jaduhñ cøxiä. Paady mijts hädaa nocy nya-jnäjaayø'øy. Y mnajuøøby hajxy coo ja'a tøyhajt hajxy quia'a møødä, ja'a häna'c høhñdaacpähajxy.

22 Je'eduhñ ñänøømby, pøn jaduhñ mänaamb cooc tyijy ja'a Jesús tøø quia'a quexyii ja'a Diósäm. Ja'a Cristo miädsip je'e, pøn jaduhñ ca'a capxpaaatp ja'a Dios møødä yHuung. **23** Pønä Dios yHuung jaduhñ capxpáatäp, miøødhijpiä Dios je'e. Pero pønä yHuung jaduhñ ca'a capxpáatäp, cabä Dios jaduhñ miøødhity.

24 Mgudiúnäp ja'a Diosmädia'agy hajxy tehñgajnä neby hajxy mbanøcxtsohñän. Coo hajxy jaduhñ mgudiúnät, mänitä Dios hajxy tehñgajnä mmøødhidät tu'ugmädia'agy møødä yHuung. **25** Y

cøjxta'axiøø hajxy xyagjugyhadáanäm neby je'e jiugyhatiän neby hajxy tøø xyajwiinwaanøøyyäm.

²⁶ Naxy hajxy mdehm wyiinjuø'øwät coo mijts ja'a Cristo miädsiphajxy xjia wi'i wyiinhøøna'añ.

²⁷ Mijts, cabä yajnähixøøbiä hajxy myajmaajiaty. Mmøødhajpiä Dioshespíritu hajxy. Xyajnähixøøbiä tøyhajt hajxy cøxiä. Cab yhøhñda'agy. Mmøødhídäp hajxy jaduhñ tu'ugmädia'agy neby hajxy tøø xyajnähixø'øyän.

²⁸ Hoorä, tu'ugmädia'aguiä Jesucristo hajxy mmøødhíjnät neby hajxy jaduhñ mga'a tsähdíünät coo quiädaactägåtsät. ²⁹ Mnajuøøby hajxy coo ja'a Jesucristo pojvä cädieey quia'a møødä. Jaduhñ hajxy mnajuøøbiät coo ja'a Dios yhuunghaty pønjaty hoy wädijp.

3

¹ Xjiaançh tehm chójcäm ja'a Dios hajxy. Hamuumdu'joot hajxy xyhuunghájtäm. Tøyhajt jaduhñ. Pero cabä jäya'ay hajxy xñajuøøyyäm coo ja'a Dios hajxy xyhuunghájtäm. Hix, cabä Dios hajxy yhixyhaty. ² Hoorä, tøø ja'a Dios hajxy xyhuunghájtäm. Cahnä yajnajuø'øy neby hajxy xyaghidáanäm. Pero coo ja'a Jesucristo quiädaactägåtsät, nnajuøøyyäm hajxy coo hajxy jaduhñ nhidáanäm neby je'ejan. Nhixáanäm hajxy jaduhñ neby jaduhñ yhitiän. ³ Pøn hamuumdu'joot mäbøjp, hoy jaduhñ wiädity nebiä Jesucristo hoy yhitiän.

⁴ Pøn haxøøg jatcøøby, cabä Diosmädia'agy quiidiuñ. Je'e jaduhñ xøhajp ja'a haxøøgpä coo ja'a Dios miädia'agy mga'a cudiúuñät. ⁵ Paadiä Jesucristo yaa tøø yhoy hädaa yaabä naaxwiin

nebiä nbojpä ngädieey hajxy xyajnähwáatsämät. Pero cab jaaya'ay pojpä cädieey ñä'ägädä møødä. Tøyhajt jaduhñ. ⁶ Pønä Jesucristo tu'ugmädia'agy møødhijp, cab jaduhñ haxøøg jiatcø'øy. Pøn jaduhñ jatcøøby, cabä Jesucristo miädia'agy ñä'ägädä mäbøjcä. ⁷ Mägu'ughajpädøjc, cab hajxy myajwiinhóønät. Pøn hoy wädijp, cabä pojpä cädieey ñä'ägä møødä, nebiä Jesucristo quia'a møødän. ⁸ Pøn hoy ca'a wädijp, pianøcxäp je'e ja'a møjcu'ugongä miädia'agy. Homiänaajä ja'a møjcu'ugong haxøøg jiatcø'øy. Mänit jiatcøøchohñ mänaa hädaa yaabä naaxwiin yhawijy tiøø'xta'aguiän. Paadiä Dios yHuung yaa tøø yhoy, nebiä møjcu'ugong jaduhñ quia'a mäjädä'agät. ⁹ Pønä Dios tehm tiøyhajt Teedyhajp, cabä jioot chocy coo jaduhñ jiatcø'øwät, je'eguiøxpä coo je'e miøødhidyíijäm ja'a Diósäm. Coo je'e Dyios yhuungä, paady haxøøg quia'a jatcø'øy. ¹⁰ Jaduhñ myajnajuø'øwät pøn Dioshuung. Entonces, pøn hoy ca'a wädijp, pønä miägu'ughajpä ca'a tsojp ca'a pa'häyoob, ca'a Dyios je'e yhuungä. Pero pianøcxäp ja'a møjcu'ugongä miädia'agy je'e.

¹¹ Mänaa ja'a Diosmädia'agy hajxy mmäbøjtsooñän, jaduhñ hänajty miäna'añ coo hajxy nničhojc nnibia'häyóowämät. Høxtä jäda'anäbaadyñä jaduhñ miäna'aññä. Cab jaduhñ mänaa tiägach. ¹² Cab hajxy njatcøøyyämät nebiä Caín jecy jiatcøøyyän coo yhamdsso puhyä'ay yagho'cy. Paady jaduhñ yagho'cy coo howyiinmahñdy hänajty quia'a møødä, nebiä piuhya'ay howyiinmahñdy hänajty miøødän. Hix,

pianócxäp ja'a møycu'ugongä miädia'agy hänajty je'e.

13 Entonces, hermanodöjc, cab hajxy myagjuó'owät coo häna'c hajxy xmiähahájtäm.

14 Højtshájtäm, cøjxta'axiøø hajxy jim nhidääñäm tsajpootyp. Cab hajxy mänaa jiiby nhäda'agø'owääñäm haxøøgtuum. Nmøødhájtäm ja'a tøyhajt hajxy jaduhñ je'eguiøxpä coo hajxy hamíñ haxøpy nničhojc nnibia'häyóowäm. Pønä miägu'ughajpä ca'a tsojp ca'a pa'häyoob, je'eds jiiby häda'agø'owaaamb haxøøgtuum.

15 Pønä miägu'ughajpä mähañhajp, jaduhñä wyiinmahñdy je'e nebiä jäya'ay-yagho'pan. Y cabä jäya'ay-yagho'pähajxy cøjxta'axiøø jiugyhada'añ nebiä Dios jiugyhatiän. Tøyhajt jaduhñ. **16** Coo ja'a Jesucristo hajxy tøø xñähho'túutäm, jaduhñä tøyhajt hajxy nmøødhájtäm coo ja'a Dios hajxy xjiaançh tehm chójäm. Hawiinmats hit jaduhñ coo hajxy hamíñ haxøpy nniñähho'túutämät.

17 Coo ja'a mäyøøjäya'ay ja'a häyoobä quia'a näxúudsät, cab jaduhñ quiudiun nebiä Dios hajxy xyhanéhmäm coo hajxy hamíñ haxøpy nničhojc nnibia'häyóowämät. **18** Mägu'ughajpädöjc, tsøgxä hajxy hamuumdu'joot niñäxuu'tsäm. Jaduhñ hajxy nyajcähxó'cämät coo hajxy hamuumdu'joot nničhojc nnibia'häyóowäm. Coo hajxy nga'a niñäxuu'tsämät, cab jaduhñ tiuna'añ coo hajxy nja mänääñämät cooc tyijy hajxy nničhojc nnibia'häyóowäm.

19 Hermanodöjc, coo hajxy hamuumdu'joot nničhojc nnibia'häyóowämät, jaduhñä tøyhajt hajxy nmøødhájtäm coo ja'a Dios hajxy

xyhuunghájtäm. **20** Y coo ja'a njoothajxy hamdsoo miänääñämät cooc tyijy hajxy hoy nga'a jääya'ayhájtäm, tsipcøxp ja'a Diosmädia'agy hajxy nmäbójcämät. Cabä nhamdsoo wiinmahñdyhajxy nyajcopcóøyyämät. Hix, xjoodhíjxäm ja'a Dios hajxy. Cøxiä hajxy xñiajuøyyäm. **21** Y coo ja'a njoothajxy waamb quia'a mänääñämät, jaduhñä tøyhajt hajxy nmøødhájtäm coo ja'a Dios hajxy xyhuunghájtäm. **22** Xmióoyyäm ja'a Dios hajxy tijaty hajxy nmäyujwääñäm, je'eguiøxpä coo hajxy ngudiúuñäm nebiaty hajxy xyhanéhmäm. Paady hajxy xquiumáayyäm. **23** Jaduhñä Dios hajxy xyhanéhmäm coo ja'a yHuung Jesucristo miädia'agy hajxy nmäbójcämät, coo hajxy hamiiñ haxøpy nničhojc nnibia'häyóowämät, nebiä Jesucristo hajxy hamdsoo tøø xyajwiingapxóøyyäm. **24** Pøñä Dios miädia'agy cudiúuñäp, tu'ugmädia'aguiä Dios jaduhñ miøødhity. Y jaduhñä tøyhajt hajxy nmøødhájtäm coo ja'a Dios hajxy tu'ugmädia'agy xmiøødhíjtäm, je'eguiøxpä coo ja'a yhEspíritu hajxy tøø xyajnäguéjxäm. Ja'a yhEspírituhaam hajxy xyhawääñäm coo hajxy tu'ugmädia'agy xmiøødhíjtäm.

4

1 Hermanodøjc, nämayyä høhñdaacpähajxy jii wiädity. Cabä tøyhajtpä hajxy ñä'ägädä yecy. Entonces, cabä hoñä'ä mädyii mädia'aguiä hajxy mmäbógät nä'ä nägoobä. Pero jawyiin hajxy mhuuc mädia'agyhíxät pø Diosmädia'agy jiaančh møød. **2** Jaduhñä tøyhajt hajxy mmøødhådåt pø Diosmädia'agy jiaančh møød. Pø mänaamb

jaduhñ cooc ja'a Dios yHuung Jesucristo tøø jiaançh jäya'ayhaty hädaa yaabä naaxwiin, pues Diosmädia'agy jaduhñ jiaançh møød. ³ Pero pø cab jaduhñ miäna'añä, cabä Diosmädia'agy miøødä. Ja'a Jesucristo miädsip miädia'agy jaduhñ. Tøø hajxy mmädoyhaty coo ja'a miädsip yaa quiähxø'øga'añ hädaa yaabä naaxwiin. Bueno, yaadsä miädia'agy jaduhñ wiädijnä hädaa yaabä naaxwiin.

⁴ Pero mijts, ja'a Dios hajxy xyhuunghajp. Tøø hajxy mga'a yajmäjäda'agy ja'a häna'c yø'øduhmäbä høhñda'agymiädia'agy yajwädijpä. Hix, maas mäjaamøødä Dios quejee ja'a møjcu'ugong miøødä, ja'a yaa hanehmäbä hädaa yaabä naaxwiin. ⁵ Yø'ø høhñdaacpähajxy jaduhmbä, ja'a møjcu'ugong miädia'agy hajxy quiudiúuñäp; paadiä møjcu'ugongä miädia'agy hajxy miädiaacä. Y paadiä miädia'agyhajxy yaa yajcopcóøyyäxä hädaa yaabä naaxwiin. ⁶ Pero højts, ja'a Dios hajxy xyhuunghájtäm. Y cab pøñ nmädia'agyhajxy xyajcopcø'øwáañäm. Jagooyyä hajxy yajcopcø'øwa'añ pøñä Diosmädia'agy mäbøjp. Jaduhñä tøyhajt hajxy nmøødhájtäm pøñ tøyhajt Dioshuung. Pøñä nmädia'agyhajxy xyajcopcøøyyäm, Dioshuung je'e. Pøñ jaduhñ xquia'a mädoowäm, ja'a møjcu'ugongä miädia'agy jaduhñ quiudiúuñäp.

⁷ Hermanodøjc, tsøg hajxy tehngajnä niçhojc nibia'häyóowäm hamïñ haxøpy, je'eguiøxpä coo ja'a Dios hajxy xchójcäm. ⁸ Pero pøñ xquia'a tsojc xquia'a pa'häyóowäm, cabä Diosmädia'agy miäbøcy. Xchójcäm ja'a Dios hajxy jaduhñ. Jaduhñ miäna'añ coo hajxy nniçhojc nnibia'häyóowämät.

9-10 Coo ja'a Dios hajxy xchójcäm, paadiä Dios ja'a yHuung Jesucristo hajxy yaa tøø xyajnäguéjxäm hädaa yaabä naaxwiin, neby hajxy jaduhñ xñähho'túutämät ja'a nbojpä ngädieeyhájtäm, neby hajxy jim nhíjtämät tsajpootyp cøjxta'axiøø. Ca'a jie'eguiøxpä coo ja'a Dios hajxy njahmiéjtsäm.

11 Coo ja'a Dios hajxy xjiaanč tehm chójcäm, paady hajxy hamíñ haxøpy nničhojc nnibia'häyóowämät. **12** Tøyhajt jaduhñ, cabä Dios mänaa yhixyii. Pero cab jaduhñ ñejpiä. Hoyyä Dios hajxy mänaa nga'a híjxäm, coo hajxy hamíñ haxøpy nničhojc nnibia'häyóowämät, jaduhñä tøyhajt hajxy nmøødhájtäm coo ja'a Dios hajxy homiänaajä xcwieendähájtäm. Y coo ja'a Dios hajxy xchójcäm, maas hoy hajxy nničhojc nnibia'häyóowäm. **13** Bueno, coo ja'a Dios ja'a yhEspíritu hajxy tøø xmióoyyäm, jaduhñä tøyhajt hajxy nmøødhájtäm coo hajxy nmøødhíjtäm tu'ugmädia'agy. **14** Y hamdsoo ja'a Jesucristo hajxy tøø nhíjxäm mänaa ja'a Dios yaa tøø quiexiän, mänaa hajxy tøø xñähho'túutäm. Tøyhajt jaduhñ. **15** Pøñ jaduhñ mänaamb cooc ja'a Jesucristo Dyioshuungä, tu'ugmädia'agy ja'a Dios jaduhñ miøødhity.

16 Jaduhñä tøyhajt hajxy nmøødhájtäm coo ja'a Dios hajxy xchójcäm. Nmäbøjcäm hajxy jaduhñ. Xchójcäm ja'a Dios hajxy jaduhñ, paadiä Dios tu'ugmädia'agy miøødhity pøñ homiänaajä jahmiejtsp ja'a Dios. **17** Coo ja'a Jesucristo hajxy xchójcäm, maas hoy hajxy nničhojc nnibia'häyóowämät hädaa yaabä naaxwiin. Y coo hajxy jaduhñ nničhojc nnibia'häyóowämät,

cab hajxy jaduhñ ndsähgøøyyämät mänaa ja'a Jesucristo miñ chaačhtiuna'añän ja'a hajxy ca'a mäbøjpä. ¹⁸ Pønä Dios hamuumdu'joot ca'a jahmiejtsp, tsähgøøby je'eduhn je'eguiøxpä coo yajcumädowa'añii. Pero coo ja'a Dios hajxy hamuumdu'joot njahmiéjtsämät, cab hajxy jaduhñ nnä'ägä tsähgøøyyämät. Hix, pøn jaduhñ tsähgøøby, cähxø'p jaduhñ coo ja'a Dios hamuumdu'joot quia'a jahmiech.

¹⁹ Jayøjpä Dios hajxy xchójcäm, paady hajxy jaduhñ njahmiejstägájtsäm. ²⁰ Pøn jaduhñ nä'ä mänaamb: "Njahmiéjchpøchä Dios", hoyyä miägu'ughajpä jia mähanhaty, høhñdaacp je'eduhn. Pø cabä yhamdsoo mägu'ughajpä ñä'ä tsocy ñä'ä pa'häyoy, cabä Dios hoy jiahmiédsät. Haa ca'a, yhixypä miägu'ughajpä homiänaajä, pero cabä Dios mänaa yhixy. ²¹ Hamdsoo ja'a Dios hajxy xyhanéhmäm coo ja'a nmägu'ughajpä hajxy ndsojc nba'häyóowämät, jaduhñ mäwíinäts nebiä Dios hajxy njahmiéjtsäm.

5

¹ Pøn jaduhñ mäbøjp coo ja'a Jesucristo Dyiosquexiä, miäbøjpiä Diosmädia'agy je'e. Y pønä Dios jaduhñ jahmiejtsp, chojpy pia'häyooby je'e pønjatiä Diosmädia'agy mäbøjp. ² Coo ja'a Dios nDeedyhájtäm hajxy njahmiéjtsäm, coo ja'a miädia'agy hajxy ngudiúunäm, jaduhnä tøyhajt hajxy nmøødhájtäm coo hajxy nničhojc nnibia'häyóowäm, je'eguiøxpä coo ja'a Dios hajxy xyhuunghájtäm. ³ Coo ja'a Dios hajxy njahmiéjtsäm, je'eduhn ñänøømby coo ja'a miädia'agy hajxy ngudiúunäm. Y cabä Dios

tsipjaty yhane'emy. ⁴⁻⁵ Coo ja'a Dios hajxy xyhuunghájtäm, coo ja'a miädia'agy hajxy nmäbójcäm, paadiä møycu'ugong hajxy jaduhñ nga'a yajmäjädåacäm, je'eguiøxpä coo hajxy nmäbójcäm coo ja'a Jesucristo Dyioshuungä.

⁶ Tøyhajt jaduhñ coo ja'a Jesucristo ñäbejty. Jaanä tøyhajt jaduhñbä coo yho'cy cruzcøxp. ⁷ Jaduhñä Dioshespíritu miäna'añ cooc ja'a Jesucristo Dyioshuungä, y cabä Dioshespíritu mänaa yhøhñda'agy. ⁸ Coo ja'a Jesucristo jaduhñ ñäbejty, coo yho'cy cruzcøxp, y coo ja'a Dioshespíritu jaduhñ miäna'añ, jaduhñä tøyhajt hajxy nmøødhájtäm coo ja'a Jesucristo Dyiosquexiä. ⁹ Maas tsoobaatpä Dios ja'a miädia'agy quejee ja'a jäya'ay ja'a miädia'agyhajxy. Y jaduhñä Dios miäna'añ cooc ja'a Jesucristo yHuunghaty. ¹⁰ Pønä Jesucristo miädia'agy mäbójcäp, miøødä tøyhajt jaduhñ coo ja'a Jesucristo Dyioshuungä. Hix, ja'a Dios jaduhñ hawáaanäp. Pero pønä Dios ja'a miädia'agy ca'a mäbójcäp, jaduhñ je'e miäna'añ cooc tyiji ja'a Dios yhøhñda'agy. Hix, cabä Dios ja'a miädia'agy miäbójcäxä coo ja'a Jesucristo yHuunghaty. ¹¹ Paadiä Dios hajxy tøø xpiädåacäm hawa'adstuum coo ja'a Jesucristo hajxy tøø xñähho'túutäm. Paady hajxy jaduhñ njugyhadåaanäm nebiä Dios jiugyhatiän cøjxta'axiøø. Tøyhajt jaduhñ. Ja'a Dios jaduhñ mänaamb. ¹² Pønä Dioshuung ja'a miädia'agy mäbójcäp, hodiuum je'eduhn yhity. Cøjxta'axiøø jiugyhadåañ nebiä Dios jiugyhatiän. Pero pøn jaduhñ ca'a mäbøjp, cab jaduhñ jiugyhadåañ nebiä Dios jiugyhatiän.

13 Mijts, mmäbójcäp ja'a Dioshuungä miädia'agy hajxy. Mítshøch hädaa nocy nyajnäjaayøby nebiä tøyhajt hajxy jaduhñ mmøødhådät coo hajxy hodiuum mhity, coo hajxy mjughada'añ nebiä Dios jiugyhatiän cøjxta'axiøø.

14 Coo ja'a Dios hajxy tu'ugmädia'agy nmøødhåjtämät, jaduhñä tøyhajt hajxy nmøødhåjtäm coo hajxy xmiädóowämät coo hajxy tijaty nmäyujwáanämät. **15** Paadiä tøyhajt hajxy jaduhñ nmøødhåjtäm coo hajxy xmio'owáanämät.

16-17 Ja'a häna'c-hajxy haxøøgwädijpä, haagä haxøøgtuum hajxy ñøcxø'øwa'añ. Y pø miøødä mmägu'ughajpä pojpä cädieey, mmänuu'xtá'agäp ja'a Dios coo ween yajnähwa'açhii. Pero coo ja'a mmägu'ughajpä ja'a Diosmädia'agy tehngajnä quia'a mäbögät cøjxta'axiøø, haxøøgtuum jaduhñ ñä'ägä hídät; y cabä piojpä quiädieey mänaa ñähwáatsnät. Y cabä Dios mmänuu'xtá'agät coo ja'a mmägu'ughajpä yajnähwa'adsøøjät, je'eguiøxpä coo ja'a yhamdssoo wiinmahñdy jaduhñ yajtuñ.

18 Pønä Dios Teedyhajp, cab jaduhñ mänaa yhaxøøghäna'c-haty. Cueendähájtäp je'eduuhñ ja'a Jesucristäm, ja'a Dioshuung. Cabä Jesucristo ja'a møycu'ugong jaduhñ mänaa yajmäjäda'agy. Tøyhajt jaduhñ.

19 Jaduhñä tøyhajt hajxy nmøødhåjtäm coo ja'a Dios hajxy xyhuunghåjtäm. Pero pønä Dios ca'a Teedyhajp, tøø quia'a yajmäjäda'agyíijäm ja'a møycu'ugóngäm.

20 Jaanä nmøødhåjtäm ja'a tøyhajt hajxy jaduhñbä coo ja'a Jesucristo ja'a Dioshuung hajxy hoy tøø xyajnähixøøyyäm ja'a Diosmädia'agy, coo

hajxy jaduhñ nmäbójcämät coo ja'a Dios tiu'ugä. Y tu'ugmädia'aguiä Dios hajxy nmøødhíjtäm møødä yHuung Jesucristo. Hodiuum hajxy tøø xpiädáacäm. Cøjxta'axiøø hajxy njugyhadáañäm nebiä Dios jiugyhatiän. ²¹ Mägu'ughajpädøjc, cab hajxy tii mwiingudsähgó'øwät, ni quepychech, ni naaxpoch, ni tii. Jagoo ja'a Dios hajxy mwiingudsähgó'øwät, ja'a jim hijpä tsajpootyp. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
4e564219-157f-5807-b810-47a15308b8b8